

東
華
續
錄

東華續錄

嘉慶二十五

臣王先謙敬編

臣周瀚蕃恭校

嘉慶十三年戊辰春正月己亥以來歲五旬萬壽詔舉恩科鄉會試○甲辰閏浙總督阿林保奏拏獲蔡華義子蔡三來等○丙辰諭向來內廷行走諸王例應每日進內入直惟念儀親王係朕之長兄見已年逾六十冬閒天氣嚴寒夙興入直實覺勞瘁卽時值夏令亦不免於暑熱允宜特加優恤以資頤養嗣後儀親王所管各處遇有值日奏事及帶領引見並應行慶賀時節仍照常進內呈遞膳牌其餘無事之日卽不必進內仍照舊在內廷行走用示恩眷成親王俟將來年過六旬亦一體加恩至滿漢文武一品大臣在七十以上者遇奏事值班之期除仍遵照前年降旨遣人

呈遞膳牌外交冬以後著於辰正進內交春以後著於辰初進內其內廷行走年逾七旬之大臣每日應入直者亦準此例至耄布見雖未屆七旬但年已六十有九筋力不能強健亦著加恩准照前例用示朕引年尙齒優待耆臣至意○丁巳轉廣興爲刑部左侍郎調穆克登額爲刑部右侍郎以馬慧裕爲盛京刑部侍郎由內閣學士遷○戊午諭浙江提督李長庚宣力海洋忠勤勇敢不辭勞瘁

懋著威聲數年以來因閩浙一帶洋盜滋事經朕特用爲總統大員督率各鎮舟師在洋剿捕李長庚身先士卒銳意擒渠統兵在閩浙臺灣及粵省洋面往來跟剿艱苦備嘗破浪衝風實已數歷寒暑每次趕上賊船無不痛加剿殺前後殲斃無數擒獲賊船多隻蔡逆亡魂喪膽畏懼已極聞李長庚兵船所至四處奔逃正在盼望大捷之際乃昨據阿林保等奏到李長庚於上年十二月二

十四日由南澳洋面駛入粵洋追捕蔡逆望見賊船止贗三隻窮
蹙已甚官兵專注蔡逆窮其所向追至黑水洋面已將蔡逆本船
擊壞李長庚又用火攻船一隻乘風駛近挂住賊船後艚正可上
前擒獲忽暴風斗作兵船上下顛播李長庚奮勇攻捕被賊船礮
子中傷咽喉額角竟於二十五日未時身故覽奏爲之心搖手戰
震悼之至朕於李長庚素未識面因其在洋出力疊經降旨褒嘉
並許以奏報擒獲巨魁之時優予世職李長庚感激朕恩倍矢忠
盡不意其功屆垂成之際臨陣捐軀朕披閱奏章不禁爲之墮淚
李長庚辦賊有年所向克捷必能擒獲巨魁朕原欲俟捷音奏到
將伊封授伯爵此時李長庚雖已身故而賊匪經伊連年痛剿之
後殘敗已極勢不能再延殘喘指日舟師緊捕自當縛致渠魁况
李長庚以提督大員總統各路舟師今歿於王事必當優加懋獎

用示酬庸李長庚著加恩追封伯爵賞銀一千兩經理喪事並著於伊原籍同安縣地方官爲建立祠宇春秋祭祀其靈柩護到日著派巡撫張師誠親往同安代朕賜奠並查明伊子見有幾人其應襲封爵俟伊子服闋之日交該督照例送部引見承襲其李長庚任內各處分著悉予開復所有應得卹典仍著該部察例具奏以示朕篤念勞臣施恩無已至意尋子祭葬諡忠毅○諭軍機大臣等李長庚追賊身故係在粵省湖陽縣地方該地方官自己稟報吳熊光備知其詳因思王得祿本因朱潰匪船逃竄粵洋跟蹤追捕並與錢孟虎會合辦理今王得祿既經前往追勦蔡逆則朱逆一路必須大員專辦且蔡逆見既逃至粵洋恐有與朱潰盜船勾結之事著吳熊光飭知錢夢虎卽責成該提督統率所帶粵省兵船專勦朱潰一股杜其與蔡逆勾結一路此爲最要又諭李長

庚此次究因猛於攻敵猝然被害阿林保仍當密訪王得祿等於
猛勇之中加以慎重不可輕易冒險致涉疏虞但亦不得因李長
庚受害稍形氣餒至水師見無總統之員阿林保見已前往廈門
漳州一帶卽著阿林保擇要駐紮調度一切再見訊蔡三來鄭昌
所供蔡逆本船所挂牛皮綯紗多層於接仗時汲取海水淋溼礮
火不能驟入必須兵船四面圍攏先用長柄鈎鐮將綯紗牛皮拉
去再用礮火一轟全船賊眾可以殲獲等語此時王得祿等兵船
自應多備長柄鈎鐮以便應用

二月丁卯朔命 皇次子釋奠 先師孔子○戊辰諭莊靜固倫

公主莊敬和碩公主自下嫁後尙未赴游牧拜其祖塋著加恩准
其各赴該游牧展拜並著該部院各衙門查例具奏令各起程○
己巳命山東運河各工仍歸沿河各州縣衛疏濬○定新疆卡倫

同京侍衛章京六年更派例○庚午 上御經筵○癸酉四川總

督勒保奏咽隴麻里野番嚮化投誠請入版圖賞給長官司印信
得旨允行○乙亥諭據長齡等會議青海辦事大臣請照舊制仍
駐紮西甯一摺所議是青海辦事大臣管轄地方遼闊從前定制
駐紮西甯原以該郡城爲各路適中之地控制較爲得力若移駐
貴德等處其於番地較近者雖易於震懾而以全局而論則相距
寫遠之地鞭長莫及轉恐顧此失彼自不若仍循舊制足資鎮撫
至該處黃河以北輪派兵六百名扼要駐守務令嚴密巡查遇有
番賊竊掠等事隨時捕緝該大臣暨西甯河州二鎮並實力操防
以靖邊圉不可稍有疏懈○諭軍機大臣等特滿額奏途次接奉
諭旨馳赴西藏頒賜達賴喇嘛等賞件並遵旨明白宣示一摺所
論俱是此次呼畢勒罕出世諸多徵驗實爲吉事有祥殊堪嘉慰

特清額馳抵西藏後當曉諭班禪額爾德尼濟咙呼圖克圖等以
從前指稱呼畢勒罕出世率多牽合附會或僅小著靈驗不足憑
信仰蒙 高宗純皇帝特賞金奔巴瓶飭令書名封貯誦經籤掣
以防弊混今達賴喇嘛甫逾二歲異常聰慧早悟前身似此信而
有徵洵爲從來所未有設當 高宗純皇帝時亦必立沛恩施無
須復令貯瓶籤掣但此係僅見之事且徵驗確鑿毫無疑義嗣後
自應仍照舊章不得援以爲例儻因稍有端倪卽附會妄指一經
查明必當治以虛捏之罪並著駐藏大臣等將此旨敬謹存記一
體欽遵辦理仍著特清額於頒賞達賴喇嘛呼畢勒罕時令通事
詢問試驗如何靈敏出眾之處將實在情形詳細覆奏○丙子予
告大學士公保甯卒遣榮郡王縣億帶領侍衛十員往奠茶酒賞
銀一千兩治喪予祭葬諡文端○丁丑諭我 皇考高宗純皇帝

六次 巡幸江浙五次 巡幸淀津每於 轡輅經臨豫 飭隨

從之王公大臣以及官員兵丁等令各加意謹慎毋許收受餽遺

藉端需索 訓誡詳明至爲諄切隨扈人等其始俱各懷遵 聖

謨咸知檢束迨後大臣中卽不免有簠簋不飭者而官員兵丁等

亦遂相率效尤積久生玩本年朕巡幸淀津閱視隄河各工爲期

不及一月此次翠華臨蒞係於當年謁 陵秋獮之外特舉省方

觀民之典或地方官等以事非常例欲藉餽遺以圖見好亟應嚴

行飭禁所有隨從王大臣文武官員兵丁等惟當律已謹嚴潔淨

自愛不可稍有沾染此在不肖地方官吏不過僅備芟芟聯絡見

情及至差竣後轉以供頓隨扈人眾爲詞嫁名漁利甚至派累閭

閭侵虧倉庫其弊有不可勝言者與其懲創於事後何如教誡於

事前凡隨從之王大臣官員兵丁等務各顧惜聲名保全官職儻

遇地方官員餽送儀物不惟金帛等件當卻而弗受卽些須食品亦當堅拒退還設該地方官於既經退卻之後仍復再三懇致卽當據實參奏毋稍徇隱經此次訓諭後或隨從人等仍復私受餽遺一經發覺予者受者均當重治其罪莫謂言之不早各宜悚遵毋忽儻不聽訓諭任意婪索朕必執法嚴懲斷不寬恕○戊寅諭國家設官分職首重得人其人果能殫心厥職視國事如己事興利除害則庶政修舉而民生胥被其益朕孜孜圖治無日不以人才爲念有能實心宣力者無論內外大小滿漢臣工必逾格旌擢以風有位如辰沅永靖道傅鼐由佐貳出身洊升道員歷任苗疆十有餘年勦除頑梗安撫善良前修建碣卡哨臺一千餘座均屯田土十二萬餘畝收恤難民十萬餘戶挑習屯練八千名收繳苗寨器械四萬餘件又復多方化導將苗民妄信師巫推牛聚眾惡

習禁止革除設立書院六處義學一百處近日苗民已知向學額
求分額考試所有鳳凰乾州一帶邊界苗眾實已革面革心輯甯
安堵凡該省歷任大員及在廷諸臣多稱係傅鼐一人任勞任怨
不顧身家盡心籌畫克臻完善朕久有所聞特因未識其人尙未
特沛恩施本日召見傅鼐見其人安詳諳練明白誠實洵屬傑出
之才堪爲苗疆保障若各省官吏皆能如此實心任事何患地方
政治不日有起色傅鼐著加恩賞給按察使銜卽令其先換頂帶
以示獎勵○定湖南鳳凰乾州永綏保靖四廳縣鄉試苗生中額
一名○癸未陳家浦壩工合龍○甲申調蔣子蒲爲倉場侍郎以
陳希曾爲工部右侍郎錢樾爲內閣學士由大理寺少卿遷○戊子以顧
德慶爲內閣學士服闋內閣學士○己丑以慶格爲江蘇按察使候補京堂○
壬辰諭向例宗室犯軍流徒枷罪名均各按等差折圈原因其系

出天潢雖身罹罪辜仍爲之存顏面示區別也無如宗室中之不肖者不念國家愛護矜全之意轉若恃以無恐往往不恤廉恥恣行不義及至按律懲治不過照常羈禁人不及見罔知愧惡罰輕生玩若非變通權衡使知所做懼不足以挽回積習嗣後宗室除奉特旨圈禁者隨時酌辦外其有犯軍流徒枷等罪者著於折圈本例內議加板責數自自二十板至四十板先於宗人府衙門令該堂官看視以家法責處其圈禁月日轉可量爲遞減著交管理宗人府王貝勒等詳察覈議奏上時著爲定例此朕保護天潢不得已之苦心俾宗室人等咸知畏法懷刑不敢陷身匪僻從此罹罰者少卽所全者眾也○乙未以明年五旬 萬壽豫飭直省督撫毋進獻珍玩

三月己亥

上親耕藉田○庚子

上啓鑾謁

東陵並巡幸天

津○免經過地方及天津府屬額賦十分之三○甲辰 上謁

昭西陵 孝陵 孝東陵 景陵 裕陵○壬子 上閱視千里

長隄○免經過州縣及天津府屬十一年以前逋賦並直隸通省

十一年以前逋賦十分之二○癸丑命減直隸軍流以下罪○丙

辰戴均元因病解任以徐端爲江南河道總督賞那彥成三品頂

帶爲江南副總河

由西甯辦事大臣選

○戊午 上駐蹕天津府○賚畿南

老民老婦○召史積容來京以朱紹曾爲湖南布政使

服闋布政使○

己未 上閱天津鎮兵○辛酉王嘉賓年老休致以梁敦懷爲廣

西按察使

由四川鹽茶道遷

○壬戌賜召試一等龍汝言等六人舉人○

廣直隸歲試學額○癸亥免直隸民欠旗租銀○甲子 上回鑾

○丙寅 上幸南苑行圍○以南河頻溢命協辦大學士長麟戴

衛亨往勘

夏四月戊辰上還京師○癸酉以汪廷珍爲內閣學士

由太僕寺卿遷

○庚辰

上閱健銳營兵○乙酉子故裕郡王亮煥祭葬諡曰僖

○丙戌

皇后行躬桑禮○丁亥諭本月得皇長孫雲初兆慶奕

葉延釐洵爲吉祥喜事允宜加惠宮闈誠妃晉封爲誠貴妃吉嬪

爲莊妃信貴人爲信嬪二阿哥之官女子那拉氏慶育皇孫加恩

封爲側室福晉○己丑改安徽宿州新設南平撫民同知爲鳳穎

分防捕盜同知○庚寅諭一日萬幾豈可稍怠本月二十二二十

三兩日內閣均未進呈刑名本章實屬非是雖因二十一日朕初

得皇長孫爲國家茂衍蕃釐敬取吉祥但究於定制未協又涉怠

於勤政況此次初得長孫宮中並未設席演劇諸事照常諸臣何

必如此迎合耶向來凡遇慶喜令辰將立決章奏暫緩呈進原有

一定章程並無因誕育皇孫連日不進刑名本章之例設從前原

議章程內載有此條朕亦必早爲刪除試思政務殷繁豈容稍有曠誤若止將立決章奏暫爲緩進一日猶屬可行至於尋常刑名事件卽降旨後尙須俟次年秋審辦理且屆時亦有情實緩決之分此時何所避忌前日朕未見奏遞刑名本章已覺不愜乃待至昨日猶未呈進實屬非是似此積壓頻仍勢必漸形叢脞豈朕敕幾勤政之意乎大學士等均著傳旨申飭嗣後不必如此揣摩朕非好言祥瑞之主惟知勤政愛民耳再前此誕育四阿哥時在廷諸王公大臣均各呈遞如意四阿哥係朕登極後皇后誕生之子臣工等抒忱展慶理所當然卽前日諸臣等因皇長孫誕育亦皆呈遞如意朕因初慶抱孫特行賞收並於兩次俱回賞如意用示錫祉聯情至此後慶育薈昌正未有艾將來凡遇誕生皇子皇孫諸王公大臣等均不准呈遞如意違者治罪將此旨著內閣存記

並諭諸王公大臣等知之○辛卯賜吳信中等二百六十一人進士及第出身有差○命故大學士保甯將軍奎林附祀伊犁雙烈祠

五月丙申朔諭軍機大臣等勒保奏我眉縣歸化汛卡外野夷滋事派兵查辦緣由一摺據稱該處野夷先於三月十三四等日潛由箐林出至歸化汛之鍋石岡等處焚掠滋擾嗣於本月初三四等日又由山後繞至太平堡所屬之花秋坪等處焚掠各該處被燒房屋不少並燒斃民人商珩等二十餘名擄去梁敬詩等六十餘丁口見經派往之道員鄭成基查明係趕山坪等支野夷並有羅同一帶熟夷在內入夥已就近派阜和協副將馬元帶兵五百名前往相機辦理等語野夷潛入內地滋擾膽敢焚燒房屋搶劫財物甚至傷掠人口甚多殊可痛恨必應大加懲創俾知畏懼並

須剋期辦淨方免日久擾累勒保派馬元帶兵五百名前往查辦如兵力尙覺不敷不妨再派五百名前往合力勦辦庶聲威壯盛即可迅速了事其提督豐紳見在已由松潘回省應卽令其趕緊前往督率辦理設另有需文員查辦之事臬司方積亦應飭令前往會同查辦至此次野夷糾眾不法是否實因口食無資是以勾結熟夷闖入內地搶掠抑或另有起釁別故務須詳晰查明其糾約人數較多必有爲首起事之人不可任令漏網再此內若有漢奸勾引尤當確切訪拏與爲首之人一併盡法處治不可輕縱總以從嚴辦理不至需緩爲要其各該處被難民戶並卽督飭地方官妥爲撫恤免致失所○己亥授八十五歲之三甲進士王服經翰林院檢討○庚子諭朕勤求治理惟日孜孜不敢稍自暇逸疊經訓諭臣工恪勤供職以符夙夜匪懈之義乃竟因循疲玩置若

罔聞本日各部院大臣因節屆端陽俱來園呈遞膳牌並無一陳奏事件者大屬非是端陽非如朝正鉅典萬壽慶辰例應虔申賀祝於應奏事宜得以量爲從緩若時值元旦萬壽朕亦斷不責令臣工呈進奏章致爲矯情之舉至於端陽不過爲屈原故事舊俗相沿實屬無關緊要非元旦可比諸臣竟因此延閣奏章其意或以爲天中節序未便奏事煩瀆謬爲仰體朕懷而於歷次訓誡之旨不知領會殊不知朕心轉爲不愜也向來端陽日內廷原有非當承應若值望雨之歲卽行停罷若雨暘時若循例踵行且俱在披閱章奏召對廷臣事畢以後不過二三時卽止於政務毫無妨礙此皆內外臣工所共見共聞者况甯使庶務稍繁多稽晷刻斷不因見值節日竟置公事於不辦也若本日有一二衙門奏事朕亦不遽加責備乃相率延閣轉增朕咎戾矣臣工等經朕再三訓

飭之後尙不知力除積習若不加以懲處不足以示儆戒因召見大學士及各部院堂官面加詢問據禮兵二部及都察院堂官僉稱本日實無應奏之事該部院衙門事務本簡卽遇輪班值日亦往往呈遞無事奏片朕所素知尙非遮飾戶部於昨日甫經奏事內務府堂官亦稱本日實無應奏之件俱著免其議處至刑部爲刑名總匯案牘較繁本日例不進刑名本章而該堂官因此意存避忌於尋常事件亦不陳奏究屬拘泥著從寬交部察議其吏工二部不得謂事簡衙門今竟無一陳奏事件殊屬不合該二部堂官著交都察院吏部議處嗣後再有應奏不奏任意積壓不止議處必行革職勿謂不教而懲言出法隨絕無情面諸臣其慎之自十四年始每遇端陽俱不必推班仍照常值日奏事不必來園呈遞全牌用副朕勤政敕幾之意○癸卯諭長麟戴衛亨奏勘明毛

城鋪無庸修復並另籌宣洩之路以利清運而防盛漲一摺據稱毛城鋪滾水壩因啓放日久河水下趨著重前經掣動大溜致成漫口經年累月始行堵合見在該壩東西相距五十餘丈口門寬廣一經啓放恐黃水建瓴而下不能循軌前進大隄難保無潰決之虞茲據康基田告稱天然開迤東數里地名十八里屯有前河臣靳輔所建石閘二座足以減黃利運當往勘明該處有小石山一座中峰兩旁有山縫二道東山縫內尙露舊時壩頂西山縫內業已積淤又復徧加採訪適有老民張姓指認帶領人夫刨挖已得原舊壩基該二閘每閘過水僅寬三丈有餘山石夾峙可保無奪溜衝決之患應請旨興修其毛城鋪石壩無庸辦理等語所辦甚好其摺內所敘情形並圖說亦皆明晰前此鐵保等請修毛城鋪原爲減黃利運起見但流弊甚多若竟照所議辦理不但工費

浩繁且該處勢若建瓴口門寬廣將來啓放時必致一發莫禦下
游潰決之患何所不至長麟戴衢亨於馳詣江境後因康基田告
稱十八里屯地方舊有壩基足資宣洩卽至彼確勘並又訪得一
百三十餘歲之張姓老民令其指引人夫立將壩基創出信而有
徵於此修復舊規較之毛城鋪工程實屬事半功倍長麟戴衢亨
能不遷就鐵保等原奏留心博訪措置得宜實爲可嘉俟工成後
再行優敘至康基田曾任河臣近因年老改用京員此次派令隨
往能將十八屯舊閘基址呈明辦理可見其平日留心河務深中
窾要應予嘉獎康基田著加恩升賞道銜並賞戴花翎張姓老民
年已一百三十餘歲尙能記憶壩座舊基帶人指認得濟要亦
屬可嘉伊從前自必得受旌賞著鐵保詳查如無頂帶卽賞給七
品頂帶再酌量賞銀數十兩並加賞大段二三匹以示獎勵所有

十八里屯修復舊閘並開挑引河打築隄岸等事俱著交該督等確估具奏於本年大汛後卽行辦理務須認真督辦期收減黃利運之益不可草率其修復毛城鋪石壩之處無庸議○甲辰以宜興爲步軍統領特克慎爲左都御史慶惠爲理藩院右侍郎由副都統遷○調成書爲兵部右侍郎以常福爲工部右侍郎○乙巳調多慶爲禮部右侍郎普恭爲兵部左侍郎○辛亥諭本日大學士議奏不進刑部本單內朕詳加酌覈如親祭 奉先殿及恭進 玉牒惇敘殿筵宴宗室向不進本之日著改爲不進立決本至皇后千秋先一日初九尙在朕萬壽期內自應仍不進刑名本章其十一向不進刑名本之日亦改爲不進重辟本皇子皇孫誕日日期仍照舊進刑名本餘俱照所議行○丙辰諭長麟戴衢亨奏續勘王營減壩及兩岸大隄至海一路各工實在情形一摺並繪圖貼

說進呈朕詳加披閱王營減壩原係掣消漲水見在舊壩地勢既偏近黃河且自堵閉決口後深塘積水施工甚難自應量爲改建著照所擬那置舊壩西首如式築作滾壩並添作石壩以爲重門保護之計所需工費應卽令確估興修俾資宣洩至沿河兩岸大隄徐州以上旣閒有卑薄處所淮揚所屬各工且多灘高隄矮山安海防等廳更有灘與隄平僅賴子堰護持者勢須普律加培以昭慎重所需估修銀二百餘萬兩著准其先於兩淮運庫內提借銀四十萬兩交鐵保等派員先將揚屬隄工卑薄較甚各處於本年伏秋前趕緊加培務臻鞏固其餘稍緩之處仍分定段落覈定銀數於霜降後次第興工其雲梯關至海口一帶情形旣經查明海口實在寬深並無阻遏形勢惟舊有隄埵之處河水平行散流兩岸村落散布民田廬舍甚多近年河水旁溢賑恤頻加應須接

築長隄爲東水歸槽衛護民生之計著照所擬卽自八灘以上將
南北二隄略倣雁翅形勢酌量接築所有估需工費及移駐修守
之處俱令鐵保等詳議辦理仍查照長麟戴衛亭所奏各條分別
各工先後次第覈實妥辦爲要○戊午命甄別各部院行走及直
省試用各捐職人員○己未諭長麟戴衛亭奏查明堰圩隄壩各
工籌畫辦理又酌分工程緩急先後覈計經費各摺並將所繪高
堰隄工圖樣進呈朕詳加批閱高堰隄工爲淮揚一帶保障關繫
非輕今石工旣因風浪掣卸不足深恃惟有加築後戩土坡以資
抵禦摺內所論甚是惟原估過加寬厚需費較多見在長麟戴衛
亭等復加酌議擬加寬頂二三四丈以資防守著卽照所奏辦理
其智禮二壩旣據勘明壩身過卑恐啓放清水時漫無收束不得
不加高壩底使有節制自係實在情形著卽照摺內所定加高四

丈之數辦理仍於其上略爲封土隨時酌量宣洩並須得守且守勿致下游頻遭淹浸爲要其仁信二壩著從緩辦理南河應辦各工固皆緊要然其勢不能同時並舉長麟戴衢亨摺內所敘除將揚屬隄工卑薄較甚之處先於本年伏秋大汛前趕辦外其餘分別緊要次要自本年霜降後以至十四十五年霜降後次第興辦其區分甚爲得宜著該督等督率工員認真經理○命嗣後吏兵二部議處罪案除私罪不准查抵外如有實係公罪經特旨交議者其應否准抵之處於摺內聲明請旨裁奪○庚申命重修山東關里至聖孔子廟○癸亥以鄂勒哲依圖爲理

藩院額外侍郎

科爾沁貝子

閏五月丙寅朔命工部左侍郎英和軍機處行走○壬午諭前因慶育皇長孫在廷王公大臣俱呈遞如意申賀外省將軍督撫亦

先後呈遞如意具摺賀喜朕因初次得孫內外大臣等抒誠展慶
是以未加駁斥隨疊次降旨諭令嗣後每遇誕生皇子皇孫俱不
准陳賀此次該將軍督撫提鎮等所遞之摺亦止係奏稱恭賀天
喜從無以頌揚之詞妄行鋪敘者自昨日將軍興奎遞到清字奏
摺始以慶賀虛言披拾入奏朕因其措詞失當業經降旨申飭然
伊摺內所敘之語尙不過侈陳吉祥並無疵謬乃本日提督仙鶴
林所奏之摺則以誕降重熙承華少海玉質龍姿前星拱極本支
百世派衍東宮等詞填寫滿紙一派狂言謬妄已極仙鶴林著革
職鎖拏交景安派委道府大員就近解赴省垣嚴行審訊並將代
擬奏摺之人一併鎖拏解省質審仙鶴林是否通曉文義此摺或
係伊出自臆撰或係授意他人代擬抑係伊本無主見止倩人撰
擬賀摺而其人遂肆意胡言均須詳細鞠訊俟將有大槩情形景

安卽一面奏聞一面將仙鶴林及代擬奏摺之人派員押送進京
交軍機大臣會同刑部嚴審定擬具奏○齊布森緣事降調以錢
楷爲河南布政使由光祿寺卿遷○癸巳免四川夷匪滋擾之馬邊廳屬
額賦

六月丙申江蘇荷花塘運河溢○甲辰諭朕惟農桑爲致治之原
一夫不耕或受之饑一婦不織或受之寒惟人君震動恪恭於上
斯小民趨事赴功於下七月之什無逸之圖重民事所以固邦本
也我朝 列聖相承惠愛黎元勤思本業 聖祖仁皇帝詔刊耕
織圖四十六幅作爲詩章分冠其上其於農事自浸種以至祭神
於蠶事自浴蠶以至成衣形撫藻績纖細畢陳恭繹 睿謨蓋以
人主生長深宮恐於小民作苦之事未能洞悉用是被諸 詠歌
垂型奕禩 皇祖世宗憲皇帝依題成什 皇考高宗純皇帝繼

復恭和 元韻均以 聖祖之心爲 心敬念民依後先同揆乾

隆二年會 命詞臣纂輯授時通考一書內列耕織圖二卷 三

朝御製詩依次恭載煌煌 聖訓萬古維昭朕紹承 前烈日以

民生爲念惟思爲閭閻廣衣食之源俾之含哺挾纊永慶盈甯近

於幾暇續題耕織圖成五言律詩四十六章檢閱授時通考係刊

於乾隆七年其耕織圖卷內恭載 聖祖御製於前次列 世宗

御製又次列 皇考御製則書 皇帝御製恭和 聖祖仁皇帝

原韻當時體例應然今朕續有題詠應補行編載原書篇葉內餘

幅甚寬著交文穎館總裁等恭查耕織圖各幅前 皇考御製詩

俱敬謹改書 高宗純皇帝御製恭和 聖祖仁皇帝原韻再將

朕詩次列於後標目書皇帝御製繕冊進呈交武英殿補刊以示

朕祇遵 成謨重民務本至意並將此旨載入以紀補編年月○

乙巳諭朕每日召見各部院衙門尚書侍郎及卿員等詢及該衙門事務或伊等將見辦案件自行奏言及退出時轉向同官傳述卽以爲業經奏明請旨遵辦朕輪次召對臣工一時而諭之言豈能向其同署諸臣徧行曉示而本人一經傳述各同官又不敢復行請旨其中每不免有隨同遷就之弊且各部院事件如同官尙未公商定議本不應於一人獨對之時先行奏探意旨或其人先有異見於召對時輒以己意敷陳及出述時辭氣抑揚輕重之間復稍有增減而同官莫能辨正則以影射漸起專擅其弊尤不可不防嗣後各部院衙門臣工經朕於召見時詢及見辦事件或有面諭之言本人退出後傳知各同官俱著於次日公同繕片述旨如所述不誤發下後再行遵辦或所述事件其人面奏之辭與該衙門見在公司商辦之處情節不符卽著於奏片內據實聲敘另

候諭旨遵行此係朕防微杜漸之苦心各臣工等懷遵毋忽○諭
吏部奏嚴議刑部堂司各官會同宗人府審擬聞散宗室敏學恃
勢逞兇一案故爲洗刷開脫屈法徇情請將刑部宗人府堂司各
官均照溺職例革職一摺敏學倚仗宗室目無朝廷法紀及刑部
會同宗人府審擬摺內所敘情節不實不盡自相矛盾之處甚多
經朕降旨逐一駁斥伊等辦理錯謬之咎實百喙難辭刑名關繫
懲戒總須得情法之平豈容有意徇庇此次朕所以必欲嚴行懲
處者總因伊等於敏學滋事之處力爲掩飾希圖示恩邀譽且聞
刑部堂官等審辦此案時原有數人欲將敏學發往盛京圈禁持
論未決而秦承恩於召對間輒稱具奏此摺擬與審辦宗室圖克
坦爭鬧冒屬一事同日具奏並稱若以此兩案情節比較則敏學
情罪較輕伊隨告知同官此案業已奏明照例辦理該堂官等始

行遷就隨同定擬。是此案種種謬誤。皆出自秦承恩一人。主見秦承恩渥沐。皇考高宗純皇帝簡畀深恩。由詞垣擢授封圻鉅任。嗣緣事身獲重譴。復經朕棄瑕錄用。洊升刑部尙書。伊仰荷隆施。當如何感激圖報。不意於聽斷問擬之事。竟敢有心開脫。豈實心任事之道。本應照部議革職。姑念其服官已久。資格較深。著加恩降爲編修。在文穎館效力。韓對見在出差。雖於具奏此案時。未經在京。但伊前此經朕召見。屢經奏及此事。察其詞意之間。亦總欲從輕完結。並聞刑部事務。皆係伊先行擬定。朕簡用六部尙書侍郎。理宜和衷共濟。遇事虛心商酌。何得一人主持。致啓專擅之漸。韓對著降補廣東按察使。於審辦河間縣民控案完竣後。速赴新任。不准來京。吳俊見已年老。辦理廣東臬司事務。恐形竭歷。卽著來京。另候簡用。秦瀛在署專辦部務。於會審案件。未能酌覈允當。

亦且年老無能著降三級調用承辦之司員郎中台福員外郎祁
頃著照部議革職以示懲儆其餘各堂官俱應照議革職姑念董
誥在軍機處行走不能常川進署長麟甫自南河差旋於定案具
奏時未及更正伊二人尙有可原均著加恩改爲降三級從寬留
任廣興亦在內廷行走未能逐日到部伊本欲將數學問擬發遣
著加恩改爲降四級從寬留任穆克登額係每日進署與廣興有
間念其到任未久於刑名案件未能熟練且伊初意亦主發遣之
說著加恩改爲降五級從寬留任宗人府堂司各官會同審辦此
案於畫案時並未駁回改定甚屬非是不應革去職任惟一時簡
用乏人且此外諸王貝勒等與見在管理宗人府之王貝勒比較
皆不能及儀親王成親王定親王縣恩貝勒永珩均著加恩改爲
實罰職任俸三年理事官明興阿委署主事法凌阿均著加恩改

爲降五級從寬留任○以吳璫爲刑部尙書馬慧裕爲河東河道

總督崇祿爲盛京刑部侍郎慶格爲浙江布政使鰲圖爲江蘇按

察使

由淮揚道遷

○以章煦爲刑部左侍郎常明爲湖北巡撫慶保爲

陝西布政使王紹蘭爲福建按察使

由興泉永道遷

○以許兆椿爲刑部

右侍郎楊謨爲江甯布政使李奕疇爲安徽按察使

由江南河庫道遷

○

戊申江南七里溝運河溢○癸丑以王福爲內閣學士

由乾清門侍衛遷

○乙卯以博慶額爲內閣學士

由通政使司副使遷

○戊午諭松筠以皇長

孫誕育叩賀摺內惟稱叩賀聖主大喜所奏甚是皇長孫誕育諸

臣摺內止宜如此稱賀豈宜敷衍吉言松筠此摺甚屬懂事得體

伊之見識實遠勝於興奎和甯等輩昨興奎和甯愛星阿來靈等

摺內俱稱不勝踴躍欣忭等語甚屬無謂不曉事體除興奎和甯

等業經申飭外愛星阿來靈亦著申飭嗣後誕育皇子皇孫內外

王大臣不必再行具摺叩賀將此通諭知之○庚申調英和爲戶

部右侍郎慶惠爲工部左侍郎以景祿爲理藩院右侍郎

由裕密幫辦大

臣

○以多慶爲直隸泰甯鎮總兵官秀甯爲禮部右侍郎

由內閣學士遷

○以阿明阿爲工部右侍郎

由總管內務府大臣遷

東華續錄

嘉慶二十六

臣王先謙敬編

臣周瀚蕃恭校

秋七月庚午諭前據御史何學林條奏請將部中記名繁缺知府分發各省委用一摺朕披覽時卽覺其事不可行姑交吏部議奏觀其識見以爲部臣自必議駁或並將該御史附請處分乃本日吏部議上率請照該御史所奏辦理依樣葫蘆殊屬非是各部俸滿郎中保舉繁缺知府自必才具諳練本係部中出色之員平素所倚以辦事者若槩行分發各省則一時頓少熟手實於部務無裨而該員等到省之後無缺可補轉覺日久曠閒若云外任必須先往練習該員等旣能諳練部務簡用時必無不能經理地方事務之理豈外省簡任封疆大員亦須在京見任大員分發各省先

行學習乎各省道府之員原准該督撫等酌量人數隨時奏請揀發何必豫先派往轉令在彼候缺此必係見保繁缺各員因得缺需時希冀速膺外任否則各該部之員外郎主事以及候補主事等官但願實缺郎中一經分發卽可以次遞升補缺因相與慫恿爲此而該御史自計將來俸滿之後或亦可得繁缺故爲此奏吏部不加詳察率行議准豈非爲伊等特開捷徑乎所奏不准行○辛未召常安來京以張映漢爲湖北布政使劉清爲山西按察使服闋按察使○丙子以齊布森爲內閣學士由鴻臚寺卿遷○丁丑四川總督勒保奏攻克牛心山等處滋事嶺夷殲獲賊酋餘匪乞降得旨嘉獎下部議敘○庚辰上啓鑾秋獮木蘭○免經過地方額賦十分之五○壬午四川總督勒保奏生番縛獻首逆烏卜乞降涼山軍務全竣得旨獎賚○丙戌上駐蹕避暑山莊○辛卯諭軍機

大臣會同行在刑部奏審訊仙鶴林等分別定擬一摺此案仙鶴林以提督大員於慶育皇孫本應遞摺陳賀伊因素不通文義令營書郭裕昆代擬摺稿恐未妥協隨差人轉煩已革知府薛淇酌改維時薛淇適因感冒暑病未能閱看交幕友石先幾改擬石先幾遂摘用郭裕昆數語並摭拾陳言衍成一摺仙鶴林卽照繕拜發其摺內疵謬之處業經訊明係用石先幾改擬摺稿石先幾著照擬杖一百徒三年仙鶴林於自行陳奏事件並不詳加檢點致多謬妄其咎較重本應照擬遣戍念伊從前屢經帶兵打仗身受重傷著有微勞著加恩免其發往烏魯木齊仍與石先幾一律問擬滿徒

八月戊申諭留京王大臣每日交代合符方准散直○己酉上自避暑山莊巡幸木蘭行圍○癸亥免巡幸淀津經過之天津府

各州縣旗租十分之三

九月丙寅 上駐蹕避暑山莊○癸酉 上自避暑山莊回鑾○

甲戌楊志信因病解任以百齡爲山東布政使陳若霖爲山東按

察使

由四川鹽茶道遷

○丁丑以直隸新安等二十三州縣水災撥部庫

銀二十六萬兩天津北倉米二十萬石備賑○江蘇荷花塘漫口

合龍○己卯

上還京師○甲申以常恪爲甘肅按察使

由山西雁平道

○丁亥諭朕勤求民事念切授衣編氓禦寒所需惟棉之用最

廣其種植紉紡務兼耕織從前 聖祖仁皇帝曾製木棉賦迨乾

隆年間直隸總督方觀承恭繪棉花圖撰說進呈 皇考高宗純

皇帝嘉覽之餘按其圖說十六事 親製詩章體物抒吟功用悉

備朕紹衣 先烈軫念民依近於幾暇敬依 皇考聖製元韻作

詩十六首誠以衣被之原講求宜切生民日用所繫實與稼穡蠶

桑並崇本業著交文穎館敬謹輯爲一書命名授衣廣訓首載

聖祖仁皇帝聖製賦次載

皇考高宗純皇帝聖製詩再將朕御

製和韻詩載入其方觀承所進圖幅並發交如意館倣照鈎摹同

原冊所進圖說等件一併存載俟書成呈覽刊刻頒行以垂永久

○諭試用通判王履泰於回鑾途次恭進編輯畿輔安瀾志六面

當令董誥等公同閱看具奏朕覆加披覽於直隸通省河道原委

辨證明晰並將古今修防事實詳悉登載足資參考尙屬有用之

書著武英殿用聚珍板排印以備陳設頒賞王履泰著發往直隸

以通判卽補交溫承惠遇有應辦水利事宜差遣委用○己丑諭

吏部議處福慶李長森一摺李長森身任藩司於庫銀被竊並不

據實詳報輒改換日期爲回護屬員及本身處分地步並將養廉

一項劃出不行列入失竊銀數內又李秉焜揭報修文縣倉庫虧

短並未照例詳委隔屬大員查辦仍派該管知府程卓樸盤查以致不能查出至大定府局錢被竊攪和售賣又未能先事查察種種錯謬著照部議革職來京候旨巡撫福慶率照該司詳稟辦理未將藩庫失銀實情具奏又於司詳派委程卓樸盤查本屬修文縣虧空一節不卽批飭改委及失察大定局錢被竊均有應得之咎亦著照部議降三級來京以從三品京堂補用○諭軍機大臣等吳熊光等奏英吉利國夷兵擅入澳門一事英吉利國夷人藉稱大西洋地方被法蘭西占踞該國因與大西洋鄰好恐大西洋人之在澳門者法蘭西欺阻貿易輒派夷目帶領兵船前來幫護所言全不可信而且斷無此理見在先後到船九隻皆帶有礮械火藥等物竟敢灣泊香山縣屬雞頸洋面並有夷兵三百名公然登岸住居澳門三巴寺龍嵩廟分守東西礮臺實屬桀驁可惡該

員等見將該國夷船停止開艙派員剴切曉諭俟夷兵退出澳門方准起貨並稱該夷人若再挾延卽封禁進澳水路絕其糧食所辦尙是但究竟如何嚴切曉諭及見在作何準備之處全未奏及所辦太輒邊疆重地外夷敢心存覬覦飾詞嘗試不可稍示以弱此時如該國兵船業經退出澳門則已如尙未退出吳熊光卽行迭派曉事文武大員前往澳門嚴加詰責以天朝禁令綦嚴不容稍有越犯大西洋與法蘭西彼此構釁自相爭殺原屬外夷情事之常中國並不過問卽如近年緬甸暹羅二國互相仇殺節節攸關求援大皇帝一視同仁毫無偏向至於中國外藩自有一定疆界試思中國兵船從無遠涉外洋向爾國地方屯紮之事而爾國兵船輒敢駛進澳門登岸居住冒昧已極若云因恐法蘭西欺侮西洋前來幫護殊不知西洋夷人旣在中國地方居住法蘭西焉

敢前來侵奪以致冒犯天朝即使法蘭西果有此事天朝法令具在斷不能稍爲姑容必當立調勁兵大加剿殺申明海禁又何必爾國派兵前來代爲防護若云洋匪未淨欲思效力天朝尤屬無謂海洋盜匪屢經剿辦不過東竄西逃既經兵船四路擒拏不日即可殲盡餘孽又何藉爾國兵力乎看來竟係爾國夷人見西洋人在澳門貿易趁其微弱之時意圖占住大千天朝厲禁矣爾國臣事天朝平素遣使進貢尙稱恭順乃此次無知冒犯實出情理之外本當卽行拏究姑先明白曉諭爾若自知悚懼卽速撤兵開帆不敢片刻逗留尙可曲恕爾罪仍准爾國貿易若再有延挨不遵法度則不但目前停止開船一面卽當封禁進澳水路絕爾糧食並當調集大兵前來圍捕爾等後悔無及如此逐層曉諭義正詞嚴該夷人自當畏懼懷遵吳熊光等仍當密速調派得力將弁

統領水路官兵整頓豫備設該夷人一有不遵竟當統兵剿辦不可畏蕙姑息庶足以伸國威而清海澨此於邊務夷情大有關係該督撫不此之慮而唯鰓鰓於數十萬稅銀往復籌計其於防備機宜全未辦及吳熊光孫玉庭均懦弱不知大體且吳熊光充當軍機章京有年曾經擢用軍機大臣尤不應如此憤憤吳熊光孫玉庭著傳旨嚴行申飭伊等此次來摺僅由馬上飛遞亦屬遲緩此次著由五百里發往著吳熊光等卽速遵照辦理並傳諭常顯知之○以章煦爲貴州巡撫轉許兆椿爲刑部左侍郎調周兆基爲刑部右侍郎轉陳希曾爲工部左侍郎以顧德慶爲工部右侍郎由內閣○以陳預爲貴州布政使調查瀘爲江西按察使以敦柱爲貴州按察使由福建興泉永道遷○壬辰申禁貧民偷越奉天威遠堡法庫邊門私墾

冬十月癸巳朔日有食之○諭軍機大臣等前因吳熊光等奏英吉利國夷兵擅入澳門吳熊光等僅令停止開槍若延挨不退卽封禁進澳水路絕其糧食所辦懦弱不知大體當經降旨嚴飭並令軍機大臣將奏到英吉利國所遞原稟繕譯進京朕詳加披閱稟內所敘之詞多不恭順如所稱該國王多派戰船兵丁赴中國海面若法蘭西國人來至澳門豫備防堵等語殊不成話該國王旣知爲中國海面卽不應派兵擅入況法蘭西國夷人並未來至澳門何得藉詞越進天朝兵精糧足卽外藩部落或敢桀驁思逞不難聲罪致討若蠻觸相爭畝闕求救天朝一視同仁亦斷無偏護何須該國王豫籌防堵耶又稱法蘭西係各國仇人該國王派兵作敵以期保護中國博勒都雅英吉利三國買賣等語尤屬謬妄試思天朝臣服中外夷夏咸賓蕞爾夷邦何得與中國並論又

稱天朝海面盜案甚多商販被劫該國王派備兵船情願效力剿捕等語竟係意存輕視見在海洋水師兵船梭織巡緝沿海各口岸斷絕接濟盜匪日形窮蹙豈轉待外夷相助種種措詞背謬於邊務夷情大有關繫該督等接閱夷稟早當驅逐駁飭乃止以停止開船封禁進澳水路絕其糧食虛言由尋常馬遞入告且該督等具奏後該國夷船曾否退去亦未據續行馳報吳熊光不應如此糊塗懈怠實出意想之外試思邊防重地任令外夷帶兵闖入占據礮臺視爲無關緊要不知有何事大於此事者該督等接奉此旨卽著將夷船見在情形及如何密飭籌備之處速行奏聞將此諭令知之無論退去未退去卽由五百里具奏○己亥諭內府舊藏全唐文卷帙閎富於有唐一代帝王以迄士庶所著各體文採輯大備洵爲藝苑鉅觀敬思 聖祖仁皇帝欽定全唐詩風行

海寓操觚家獲覩初盛中晚源流有裨詩教甚大茲全唐文弄藏中祕外閒承學之士無由與窺美備允宜頒示寰瀛以昭盛軌著將此書交文穎館通行鈔錄並詳稽載籍有應補入者一體編輯校勘完善進呈乙覽後刊刻頒行用副朕崇文講學嘉惠士林至意○甲辰諭宜興奏請將宗室移住盛京並擬列條款開單進呈朕詳加披閱所奏斷不可行宗室移住盛京一切車輛房屋資裝器具所費不貲國家帑項有常豈能於經制之外增此重費卽伊指稱於海口餘息項內酌量動用海口息銀固不能有如許盈餘卽使有款可動亦必布置妥善行之果有實效俾宗室等各安生業不致違犯科條卽多糜帑項朕亦斷不稍有靳惜無如宗室等見住京師切近輦轂有宗人府王公及各族長分管尙不能恪遵化導若移赴盛京專責成該將軍一人管束伊等豈遂能安分守

法乎是撥移徒滋煩費而於事仍屬有名無實況宜興欲將盛京
各城旗民領種之餘租官地分撥一半以爲宗室養贍之田該處
旗民領種有年安業已久若驟行分撥則宗室固有恒產而旗民
卽有一半失業之人又安保其不別生事端宜興所奏種種窒礙
難行卽使交部覈議亦必駁斥著無庸交議並將原摺擲還○調
永保爲廣東巡撫章煦爲雲南巡撫孫玉庭爲貴州巡撫由廣
東調○
乙巳調銜齡爲江西布政使先福爲廣東布政使○戊申改河南
南陽中汎縣丞爲中牟上汎縣丞○以王綬爲內閣學士○壬子
賜徐華清等五十二人武進士及第出身有差○庚申諭吳熊光
奏英吉利國夷船尙在澳門挨延觀望情形一摺吳熊光身任封
圻重寄接據稟報早應馳赴該處躬親督辦乃任其登岸住守兩
月有餘及接奉嚴旨仍不卽時親往設法驅逐又未將派委何員

及如何籌辦之法詳悉具奏是吳熊光平日因循廢弛止知養尊處優全不以海疆爲重大負委任吳熊光著傳旨嚴行申飭先降爲二品頂帶拔去花翎仍交部嚴加議處用示薄懲

十一月戊辰以蘇沖阿爲內閣學士

由武備院卿遷

○辛未諭舊制清明

節謁

陵行數土禮惟於二十七箇月之內舉行一次以後均係

遣員恭代從前我

皇祖世宗憲皇帝

皇考高宗純皇帝皆按

定制舉行禮不敢踰自當敬謹遵守惟是朕仰蒙

皇考高宗純

皇帝恩慈眷佑溯自乾隆癸巳年卽蒙

聖心簡畀立爲皇太子

密書存記至乙卯九月始明降

諭旨敕立

深恩付託實已二

十餘年迨至丙辰元旦

授璽大廷猶復

訓政三年孜孜不已

鴻慈篤眷尤爲從來所未有春秋霜露十載於茲朕心罔極之

思豈尋常孺慕所能盡明年又適屆朕五旬誕辰春間本應謁

陵伸慕若不躬親敷土於心實覺不安有未可限於常制者明年
朕於二月十七日啓鑾二十日恭謁東陵二十一日係清明節
敬於是日親祭裕陵再舉行敷土禮一次稍申瞻戀之誠禮成
回駐盤山於是月二十九日進城回宮三月初一初二兩日齋戒
俟初三日親祭先農壇行耕藉禮畢卽於是日啓程駐蹕黃新
莊前詣西陵展謁取道潭柘寺拈香於十一日至香山駐蹕十
六日回圓明園所有應行各典禮事宜著各該衙門敬謹豫備○
壬申冊封賊妃劉佳氏爲誠貴妃吉嬪王佳氏爲莊妃貴人
劉佳氏爲僖嬪○丁丑調蔣繼勳爲廣西按察使梁敦懷爲雲南
按察使○壬午諭我朝家法相承宮庭之用甚爲節省每歲自
皇后妃嬪以至女子等所得綃段分例載在宮中則例永遠遵循
前因內廷例用之件有須外省織辦者朕意不如將庫貯之物量

爲抵給既可省交辦之煩而宮中亦得適用是年段庫所抵物件均屬敷足皇后曾率同妃嬪等陳謝咸深歡感至去歲抵給物件多屬平常且不足數皇后以事屬細微未及具奏至本年又值交領公用之期皇后曾諭令總管太監孫進忠傳諭內務府大臣等皇后分例本多無容計較惟妃嬪以下及女子等每年賞件止有此數不得減少致不敷用若再似上年短缺必據實奏聞經孫進忠面告英和蘇楞額均已聆悉乃前日在太和齋傳膳辦事召見廣興據奏總管太監孫進忠挑斥抵給物件係與段庫官員串通一氣欲交外省織造以便需索規費等語朕卽以事關外廷官員交結近侍如果確有憑據必當嚴行懲辦而廣興又不能指出確係何人朕卽覺其所言不實昨據皇后奏及前事因令將本年抵給物件逐一詳覈實共少細段至數十件之多該管大臣等於官

中例應支給之件任意剋減實屬不知大體且於皇后曾經傳諭之處並未奏聞尤爲錯誤應與承辦庫官均著軍機大臣會同該部嚴加議處至廣興於面奏時並不將孫進忠係奉皇后傳諭據實陳奏佯作不知轉以庫官勾結內監有意挑揀爲詞希圖聳聽及命軍機大臣等向伊詢問令其指出庫官姓名確據以憑嚴辦廣興仍復毫無指證惟稱係屬疑心豈有將懸揣疑似之詞遽加人以交結近侍之罪况孫進忠傳述皇后所諭並無格外排斥之處該管大臣等眾所共知廣興豈有不知之理乃竟敢挾詐面欺不知其是何居心廣興著軍機大臣等會同該部再行嚴加議處仍先革去頂帶不准進內聽候嚴議至孫進忠於皇后傳諭時卽應奏聞再行傳知乃並未具奏亦屬疏漏孫進忠並著交軍機大臣議罪○諭吳熊光於英吉利夷船擅入澳門並不親身前往設

法驅逐業經照部議革職因思陽春身任將軍職居總督之前遇有海疆要務本應具奏况前據吳熊光奏稱該將軍挑派滿營官兵豫備調遣何以並無一字奏及孫玉庭以巡撫大員於吳熊光辦理軟弱錯謬之處未能據實參劾轉以支飾空言隨同列銜具奏皆有應得之咎陽春孫玉庭均著交部議處○諭軍機大臣等昨據吳熊光等奏英吉利夷兵全數退出澳門一摺此次該國夷人自七月來至澳門住守數月有餘夷情叵測必有所爲而來何以又無故而去且所稱見聖諭嚴明兵威壯盛業已不敢抗違之語所見係何諭旨所派係屬何兵並未一一聲敘况夷稟尙未呈遞吳熊光輒稱夷船風信一過卽不能開行如果切實懇求卽准其開船見好於夷人豈非示之以弱乎外夷來至內地貿易輸納稅課原因其恪守藩服用示懷柔並非利其財貨若沾沾以徵權

爲重無怪該夷人肆意居奇意存輕視也永保馳抵粵東卽會同韓對詳查英吉利夷船因何擅入內地自七月至今呈遞夷稟幾次吳熊光如何批示所稱水陸兩途嚴密布置官兵所派係屬何兵節次稱奏派員剴切曉諭並聖諭嚴明之語所見係何諭旨所派係屬何員因何全行退出有無豫准開船貿易之事逐一奏聞仍嚴切曉諭英吉利夷人以爾等擅入澳門實屬冒昧斷不能仍准貿易儻自知悔罪畏服倍加恭順於二三年後再行懇請彼時爾國貨船亦止准在澳門以外停泊俟奏聞大皇帝候旨遵行設再欲攜帶兵船卽當永斷貿易聲罪致討儻永保到彼後吳熊光等業已准令開船卽當查明因何允准是否係該國夷人具稟懇求抑係吳熊光先行准令開船該夷始行退出之處一併據實具奏不可稍有隱飾○革吳熊光職以永保爲兩廣總督韓對爲廣

東巡撫調陳若霖爲廣東按察使以朱錫爵爲山東按察使

山東道

○甲申諭軍機大臣會同吏部嚴議廣興等於宮中例應支給細段並不敬謹遵辦擅行剋減請分別革職治罪降調一招朕綜理庶政惟務覈實從不肯顛顛了事前在太和齋召見廣興據奏總管太監孫進忠挑斥細段與段庫官串通一氣欲交外省織造以便需索規費並未指明何項支用細段亦未奏及宮中抵給分例若果所奏確實則是外廷官員交結近侍必當嚴行懲辦卽如從前和珅翫法營私一經敗露尙且徹底究辦不能稍從寬宥況事關宦寺舞弊牟利更復何所姑息必當立置重典經朕面加詢問廣興並不能指出確係何人嗣令軍機大臣向伊詳加開導令其據實直陳伊仍毫無指證止以係屬疑心爲詞豈有以懸揣臆度之談遽誣人以結交近侍之罪至宮中抵給細段上屆卽減少

不敷昨經皇后奏聞因令俟此次宮用抵給之件呈覽後再行覈辦及經呈覽則短少至數十件其物料平常不堪應用者甚多當卽降旨查詢始據查明此次承辦綉段之司員本係豫備足數其所以擅行抵扣減少者實出自廣興一人主見見有伊親筆改正字帖爲據況皇后內廷所用服色竟用數十匹醬色紗其居心竟不可問矣乃轉以庫官勾結內監有意挑揀爲詞捏飾具奏是竟欲變亂黑白顛倒是非而於總管太監孫進忠所奏皇后傳諭此次抵給綉段不得減少一節始終佯爲不知蒙混具奏欲快私忿試卽將交結近侍之條律以虛誣反坐自問當得何罪乎廣興著照軍機大臣等所議革職姑從寬免其治罪令伊家居閉門思過並著該管都統副都統等嚴行管束隨時稽查儻尙不知愧懼或有恣意妄爲之事卽當據實參奏若該都統等代爲隱飾別經發

覺必將該都統等一併懲處英和等於抵給紬段並不敬謹遵辦
輒任聽廣興一人短少抵扣且於皇后曾經傳諭之處亦未奏明
咎有應得英和阿明阿和世泰蘇楞額俱著改爲降四級從寬留
任庫官達霖等詢明原係照數豫備惟於廣興擅令減少並不阻
止且上屆承辦抵給紬段亦未能適用均有不合即中達霖福祿
員外郎福甯阿威赫俱著改爲降二級從寬留任與該堂官等降
留處分均無庸查級議汰○韓穆克登額爲刑部左侍郎嗣景祿
爲刑部右侍郎策丹爲理藩院右侍郎以博慶額爲盛京工部侍
郎明志爲內閣學士

由頭等
侍衛遷

十二月癸巳諭軍機大臣等吳璥托津會同鐵保等奏勘明海口
情形一摺據稱海口改道一說溯查前明及本朝康熙年間舊案
所有灌河入海之路覆轍具存見在周歷履勘北潮河匯流馬港

口張家莊等處漫水業已數月尚在壅積可見去路不暢且又不能刷出河槽而此外又無另闢海口之路仍請修復故道將雲梯關外大隄接築收束水勢使東注得力並據鐵保等片奏請共需撥銀二百九十萬兩務於歲底春初到工等語北潮河漫水去路不暢又無河槽伊等以見在情形證之昔年誤改成案論據確鑿是由灌河入海之說斷不可行自應挽歸故道至所稱雲梯關外水勢散漫必須接築兩岸大隄收束水攻沙之效並稱較原估丈尺可以稍減其十八里屯及減壩工程均停止緩辦撥之目前情事亦止可照議辦理惟是國家帑項實在支絀河工連年請撥之項數已不貲迄未一勞永逸詢之部臣此時各省實已無項可撥不能俯從所請况天下經費甚多豈能以天下全力專理一工乎萬不得已祇得姑照所請降旨阿克當阿令將商捐項下撥銀一

百五十萬兩趕緊解往至於兩浙運庫河南山東江西浙江四省
藩庫雖亦降旨籌撥有無尙不可知伊等止可就見有餉銀將目
前緊要各工內擇其尤急者先爲趕辦試思撥餉如此之難而伊
等此次請撥之後能不再行請撥否河患未除帑項日絀實不可
不撙節辦理鐵保等惟當激發天良督飭在工大小各員實心經
理若稍有浮混則不但王法具在而天理更屬難容祇得在工所
正法示眾決不輕恕伊等身家性命所關不可不慎之又慎○乙
未命吳熊光赴南河效力○丁酉嚴禁直省督撫奏留丁憂人員
○己亥 上詣 大高殿萬善殿祈雪○辛丑諭據吉綸奏書吏
蘇芝芳冒領糧照承審各官改供出罪一案見經審明各節分別
定擬一摺朱棟以臬司大員其在山東任內竟將罪應擬絞之舞
弊司書不行據實催提秉公審辦輒授意從輕外結罪固難追但

此案若僅止承審遲延伊豈不知該管上司處分亦不甚重何至授意屬員故出人罪擔此重大干係且蘇芝芳係藩司衙門書吏並非臬司本管更何庸曲法保全恐案內情節尙有不實不盡或竟係屬員賄求上官通同一氣均未可定必當詳加覆訊所有前任山東按察使朱棟告病布政使楊志信前署濟南府之曹州府知府金湘濟南府知府張鵬昇濟南府同知陳理盛俱著革職鞫問其蘇芝芳一犯暫緩正法同擬絞之張勳李義盛案內緊要人犯全案卷宗一併迅速派員押解來京交軍機大臣會同刑部再行詳鞫定擬具奏尋奏上得旨此案朱棟於舞弊得贓之司書不據實審辦輒因案已遲延改輕外結著發往烏魯木齊效力贖罪楊志信於朱棟改擬杖徒時未行阻止復照詳會轉著發往軍臺效力贖罪至所請金湘等可否准其援減一節金湘因恐干遲延

處分稟商朱棟從輕結案陳理盛亦順從上司改詳厥罪惟均著不准援減張鵬昇初審卽得實情並未遲延其咎止於聽從上司改擬情稍可原著准其援減餘依議○諭軍機大臣等連次吳璥托津等奏到查勘海口河口及高堰應辦各工鐵保等俱附摺請餉已需銀三百數十萬兩朕恭聞 聖祖仁皇帝實錄從前康熙年間河患更甚於今日維時靳輔于成龍籌辦此事其所往復辨論者大抵皆辦工之法並未見其將需用餉銀項項奏撥試思彼時三藩方定撤兵未久當亦在帑藏支絀之時諒不能源源發給而靳輔等於議定之後自行妥辦迄未嘗以撥帑一事上煩 聖心迨不數年而河患頓除國用並未耗竭今伊等籌辦河務每一工必先論需餉若干每一摺幾於欲請餉一次無往而非要工動稱迫不可待抑知國家經費有常度支有定如俸工兵餉等項按

數給發不能逾時而各處旱潦偏災必須隨時賑貸豈能以天下之全力專辦一處河工又豈能因一處河工停止天下經費朕慮念及此宵旰焦勞幾同從前籌辦邪教其難更甚著吳璥托津會同鐵保徐端那彥成三人盡心籌畫此後河工餉銀應如何設法布置除加賦一事係病民貳政斷不准行又如藩庫各項錢糧以及鹽課關稅並商捐等項皆不在計議之列卽見在已行之土方事例亦無庸再歸籌計外伊等當從長計議有可以資助國用不至病民滋事者卽行詳悉奏聞候朕酌量施行○壬寅諭吉綸等奏訪查廣興在東省審案劣蹟大槩情形一摺覽奏深爲駭異朕勤求民隱惟恐閭閻疾苦壅於上聞或官吏貪黷營私病民飢法必須徹底研究是以於各省控告案件覈其情節重大者特派大臣馳往鞠訊該大臣仰蒙委任宜如何秉矢虛公潔清自愛乃不

料廣興前次兩赴東省審案任性作威供頓必須華美稍不如意卽肆行呵斥伊與周廷棟同在東省審案周廷棟全無主持以致民間竟有周全天下事廣聚世閒財之謠且初在貢院居住因長齡升任總督伊卽移住院署嗣又移至鹽政行館或令家人唱曲或令優伶進唱於貢院監臨後院開池養魚據奏通省攤派差費前後共計銀數萬餘兩又訊據在平縣知縣王琅供稱廣興前在東昌時通府公攤差費起身時各送程儀又司獄任灝供稱知府嵩山送銀一千兩聊城縣送銀一千兩種種劣款不惟需索騷擾竟敢任意苞苴殊出情理之外此而不嚴行究辦何以懲貪婪而儆官邪廣興著拏交刑部交軍機大臣會同刑部嚴審定擬具奏在平縣知縣王琅著先行解任禹城縣縣丞沈鴻勳奏安府司獄任灝著革職交吉綸再行嚴訊務得確情迅速具奏卽速解京質

對其知府嵩山已訊明餽送屬實著一併解任押送來京以憑質對至周廷棟與廣興同赴東省審案閱時半年之久於伊需索受賂各款豈竟毫無聞見近日屢經召見垂詢周廷棟不但力言其並無騷擾營私情事並以廣興辦事才具明敏竟似外間物議冒加以不韙之名若謂伊實未聞知則係形同木偶儻竟知而不言則係有心徇飾且伊在東省供應亦須日費十餘兩咎有應得周廷棟著交部嚴加議處托津與廣興同赴濟甯審案時於伊劣款亦毫無覺察且據開各公館食用每日通計銀一百七十八兩至二百餘兩托津公館均在此內亦不免浮糜托津著交部議處○乙巳雪○諭前據吉綸等奏到廣興兩次往山東審案時任性作威苛求供頓日向地方官藉端呵斥暴戾恣睢致通省攤派差費多至數萬餘兩並於臨行時收受餽送種種劣蹟實堪駭異當經

降旨將廣興鞫問查鈔家產交軍機大臣會同刑部嚴審見據廣興供認收受知府嵩山餽送銀一千兩並搬移公館開池養魚等款俱已確鑿其餘尙在狡賴而本日據長麟英和等奏查鈔廣興家內不但房地甚多財物尤夥除見銀及借出存帳銀七千餘兩不計外又訪出存放帳局銀三萬七千兩並整玉如意多至六柄洋呢羽段等料多至一千餘件他物稱是此外又有代廣興寄存銀兩之盛師曾盛時彥二人查其家內見有存銀取利確據見在訊問之盛時彥等尙堅不吐實廣興賊私纍纍其由來實不可問伊屢經出差山東河南多次恐不但得受餽送或竟於審案之時向地方官威嚇取索甚至將案情顛倒婪賊窩獄均未可知亟應徹底根訊以期水落石出此案關繫甚大著添派大學士等會同刑部堂官嚴行審訊務得確情按律定擬具奏其解任之員外郎

盛時彥著革職同盛師曾一併拏問歸案審辦○諭吏部奏遵旨
議處周廷棟等一摺朝廷風憲大臣專司糾劾遇有營私翫法之
員本應隨時參奏方爲盡職前此周廷棟與廣興同赴山東審案
於廣興需索騷擾之事自必確有見聞乃覆命後竟無一字提及
近因廣興緣事革職經朕面加詢問廣興出差山東有無劣蹟周
廷棟仍不直陳並以廣興才具明敏枝梧掩飾昨據吉綸等訪查
具奏有周全天下事廣聚世間財之謠周廷棟雖未婪索而其庸
懦無能卽此可見復令軍機大臣傳詢伊亦稱曾聞此語並廣興
挑斥供應乞池唱曲等事伊亦有所知何以經朕詢問尙不據實
奏聞是其瞻徇友誼而事上轉不以誠周廷棟總司風紀尤不應
出此况伊在東供應每日需銀十餘兩亦多浮糜部議降四級調
用固屬照例辦理但周廷棟人本平庸年亦衰邁且又扶同隱飾

豈可再邀錄用周廷棟著加恩賞給五品頂帶卽予休致至托津與廣興同赴濟甯審案後朕從未將廣興出差有無需索情弊向其詢問且此時廣興事發伊又奉使出京托津之未經陳奏與周廷棟較有區別但東省所開各公館費用浮多托津亦未能盡免所有部議降二級調用之處著從寬改爲降三級留任仍著罰俸九箇月均不准抵銷○以周興岱爲左都御史調萬承風爲兵部右侍郎轉戴聯奎爲禮部左侍郎以邵洪爲禮部右侍郎戴均元爲左副都御史品候補三京堂○丁未諭據汪志伊常明奏湖北荆宜施道邱勳病故出缺請將試用道胡鑄補授一摺向來外省道府請旨缺出例應由內開單奏請簡放槩不准在外保題升補定制綦嚴近因各省督撫遇有請旨之缺輒以捐納分發候補人員開單請簡與例不符特准御史陸言等所奏交吏部申明舊例議定章

程如再有違例保題及專摺奏請者將該督撫予以處分乃該省見出有荆宜施道請旨一缺該督撫竟特保胡麟一人專摺請簡實屬不合胡麟本係已故刑部尙書胡季堂之子由廕生加捐道員年齒尙輕於吏事亦未必卽能練達該督撫何得意存市恩輒將伊保奏致啟倖進之漸所請著不准行汪志伊常明著傳旨申飭並交部議處○戊申諭欽差大臣仰承簡命赴各省審辦案件理宜秉公持正潔己爲先一切夫馬供頓應從簡約地方大吏自揣果無瑕疵可指設遇欽差有縱恣勒索情事原當據實揭參豈可私行結納轉相餽遺乃近來廣興出差河南山東供出阮元曾送過公幫銀一千兩齊布森等曾送過公幫銀二千兩長齡曾送過銀三百兩此在廣興貪污狼藉其所得自尙不止此而地方官吏輒相率攢湊幫費任意苞苴此風實不可長阮元齊布森長齡

均著交部議處此內公幫各員亦著查取職名交部議處尋議上
得旨吏兵等部議處餽送廣興銀兩之長齡阮元齊布森等均請
降三級調用無庸查抵一摺係屬照例辦理但伊三人獲咎情節
亦微有不同長齡阮元彼時俱係巡撫身任封疆大員固不應有
餽送欽差之事惟係出自己貲以盡朋情尙可託詞餽贐其咎稍
輕長齡阮元均著加恩改爲降四級留任至齊布森前在河南職
任藩司乃於眾人攢湊銀兩伊首先出名餽送尤屬不合齊布森
人本平常著實降一級作爲頭等侍衛留於庫爾喀喇烏蘇領隊
大臣辦事仍帶降四級留任○己酉免雲南各銅廠通賦○庚戌
諭軍機大臣等本日吳熊光覆奏前此降旨詢問各情據稱此次
英吉利貨船開艙係在夷兵開帆之後該夷商等央懇洋商轉求
常顯經常顯告知吳熊光始派員前赴黃埔察看情形見該夷商

數百人情詞迫切至於淚下是以始知會常顯查驗開船等語但閱其進呈夷稟內吳熊光批詞有俟夷兵退後仍准照常貿易之言看來開船雖在夷兵既退之後而吳熊光之許其開船則在夷兵未退之先該夷兵見許其開船然後揚帆始去如此光景恐難保其不乘間復來永保到粵後著遵照節次諭旨訪查明確據實具奏毋稍徇隱設或該夷兵竟敢復來應作何豫行準備之處並著悉心籌畫妥協經理不可稍涉大意○丙辰命嚴汰河工冗員○庚申以荷花塘河工合而復蠶鐵保下部議處降那彥成二等侍衛爲喀喇沙爾辦事大臣徐端爲副總河以吳璥爲江南河道總督金光悌爲刑部尙書調吉綸爲江西巡撫以百齡爲山東巡撫朱理爲山東布政使廣厚爲浙江按察使由喀喇沙爾辦事大臣遷○是歲朝鮮琉球來貢○會計天下民穀數各省通共大小男婦三萬五

千二十九萬一千七百二十四名口各省通共存倉米穀三千四
十八萬三千八百七十四石四斗一升七合九勺